



新編博物策會卷之三

南直隸



屏石戴璟著

應天府人物

東南之勝莫重建康張浚之狀形勝也永嘉之後衣冠萃止杜祐之評人物也蓋金陵之地鍾山龍蟠石頭虎踞以三吳爲東門以荆蜀爲西戶以七閩二廣爲南府此真興王之地也人生其間俗英且毅士清以邁見於揚萬里之集風流文物冠映古今見於汪藻之說然則人才之出豈無勒名於鼎彝而揚休於竹帛乎請具陳之三代人物不可考矣在漢鎮雍西而三世襲侯封則有史茅也仕吳守鬱林而兩弟膺侯封則有史嵩也以

至唐因爲僕射能通儒術不學而能之乎陶璜刺交州
能得民心不賢而能之乎逮至於晉史光在中書有名
而其後曰爽曰憲曰諒皆無愧於官守之責家教可知
矣陶回討蘇峻有功而其子曰汪曰隱曰無忌咸無愧
於守牧之任身教可知矣葛洪辭爵入羅浮山究覽典
籍富貴其能淫之哉許邁好學入餘杭山定省父母孝
行不足法哉薛兼三世傳東宮皆南金之誇非倖致也
紀少瑜十三歲善文章青鏤筆之夢非偶得也以直方
知名者紀瞻也與顧榮同召有聲必其才有爲也以博
學知名者許謚也爲蔡謨所辟不就此其志不汙也以
南北朝言之陶季直有清脩之節家徒四壁無以殯殮
而京都記可考也周顒有清貧之操切韻四聲極其精
妙而比山移文何害也劉係宗精書畫周捨精義理然
捨之損益禮儀有公輔器尤可尚也淳于量善弓馬吳
明徹善籌策然明徹大破齊師有將帥才充足稱也陶
弘景之掛冠歸山恬退之心可凌松筠也張松之兄弟
爭死孝義之風可貫神明也逮至於唐許叔牙獻纂義
十篇邃於詩禮爲弘文學士稱其職矣許儒請郊祀六
天善於說辭爲奉常博士稱其才矣史務滋與十人巡
天下不顧來俊臣之誣剛直人也劉鄴以七歲善屬文
能伸李德裕之冤正直人也五代之時朱存作覽古之
詩何學力之該博也陸昭符叱雷電之變何膽略之雄
壯也逮至於宋十歲能文者非王綸乎從祀之說其言
甚正七歲能文者非錢周材乎解元之名其學克堪陳

承昭征太原有功不可以逋將輕之也盧郢守南全有聲不可以書生易之也刁衍變奢為儉改過勇矣而子孫五人登第其積德之厚如此吳柔勝歷官有惠宅心仁矣而子潛一榜狀元黹育之善如此五使西北不辱君命則有若洪湛歷知淮南善治鹽茶則有若秦義李琮仕至太師而子耕慕淵明之節號臺岩士其志尤卓也仇著官至朝散而子博受蘇軾之知作至樂堂紀其學尤贍也秦傳序秦奭以父子死於淳化之難朝廷錄其子宜矣秦鉅秦浚以父子死於金人之戰鄉里祠於廟宜矣金人所欲也而錢戩還之粥人所願也而秦熹施之陳士風之弊者則有如俞卓編建康之志者則有如朱舜庸盧鑑善於料敵則於平蕃見之也魏良臣志於任事則於奮髯見之也吳思道工於詩而野服蕭然何高逸耶李華長於孝而蝗出不害何感格耶逮至于元楊剛中之文奇奧簡澁足以式斯世焉李桓之文紆餘豐潤足以範後學焉若夫始有代母之孝終有棄官之誠則有若樊淵也至於我

朝孫炎守死不屈以蜉蝣視死生也陳遇徵辟不就以塵埃視富貴也戴慶祖王一居皆為太常卿而沒於王事楊勉丁璿俱以庶吉士而遷於法曹僕斯兩使高麗而累官尚書楊能屢立邊功而鎮守宣府至於肅外臺而有正直之宣叅大藩而有邊儲之備此又非劉璉乎天順以後人才益以蕃矣吾未暇悉數之也

鳳陽府人物

東連三吳南引荆汝伏滔之論也長淮橫北石梁環西
連南夫之紀也王粲賦以爲渦口之曲流羅珣碑以爲
東南之樞轄然則鳳陽之地誠梁宋吳楚之衝爲齊魯
汴洛之道乃東南一大都會也考其沿革夏曰塗山楚
曰淮南秦曰九江漢曰鍾離實我

太祖龍興之地如周之岐豳漢之豐沛也人生其間慕
孝義尚信行流風所被文辭聿興倚歟盛哉請具陳之
周之時管仲以檻車之囚而成一匡之業是真有仁者
之功卞和以刖足之夫而辭零陵之封庶幾有勇士之
操以秦言之甘茂能拔韓城甘羅能割趙城一祖一孫
有不愧柱石之才陳勝因亂稱王陳嬰聽毋勿王一君
一相不負鴻鵠之志逮至于漢陳萬年內行脩飭以高

第爲扶風丙吉之薦宜也薛廣德文章溫雅以直言爲
三公蕭望之之薦宜也武涉爲楚游說而果有狗烹之
歌料事何明審也召信臣爲民興利而致有召父之號
爲政何循良也王莽之亂若陳咸之乞骸骨固矣至於
郭憲之焚衣服而有關東觥觥之譽梅福之棄妻子而
有傳以爲仙之誇皆好遯不汙者也東京之興若桓譚
之著新論固矣桓榮少學不倦而爲五更張酺習學不
倦而教四姓皆篤學有用者也習毛詩者衛宏習韓詩
者召馴然馴之爲中郎將恂恂德行不可及矣而宏之
作詩序漢儀其學尤精到也與李膺齊名者杜密與蔡
邕齊名者桓彬然典之爲侍御史行行且止不可及矣
而密之按宦官子弟其行尤爲剛方也禮瘦不如孝肥

趙孝之救弟也蓄財何以訓後范遷之敬兄也上疏請
註五經者徐防周密畏慎見於典樞椀之日少舉孝廉
四行者范滂剛毅嚴正形於攬車轡之時陳寵三歷州
邵而兼法律經書之理陳忠三遷廷尉而作縉紳先生
之論以父子而一忠厚一正直其道不異也施延明星
官而受馮敷之愛華陀曉方藥而遇曹操之禍以方技
而一榮生一橫死其命不同也以三國言之在魏而從
征有功則有若夏侯惇夏侯淵許褚若夫曹植善於屬
文而謚思劉曄善於料敵而謚景至於陳矯案文書之
諫有回車之功嵇康辭中散之職有彈琴之樂此皆魏
人物之表表也仕吳而從征有功則有若呂範丁奉若
夫薛綜爲少傅而撰詩賦薛瑩爲少傅而撰吳書至於

魯肅濟周瑜之急不以利害義蔣欽忘徐盛之仇不以
私害公此皆吳人物之磊磊者也逮至於晉胡質胡威
父子以清慎聞也威之言曰父清惟恐人知臣清恐人
不知此其優劣之辨也劉宋劉惔祖孫以令名著也惔
之諫曰居官無官官之事處事無事事之心此其造詣
之高也夏侯湛連璧之號不以其美名以其能文也隗
炤搖金之兆不以其獲利以其善易也嵇紹死蕩陰之
難而御血爲之勿去嵇康可謂有子矣桓彝死蘇峻之
難而五子又能繼美桓榮可謂有後矣嵇含立亳丘之
號好學能文陳寔就安國之封沉重有智孝婦之寃曹
攄辨之何其明永昌之亂劉翼死之何其介戴逵善鼓
琴固矣而辨放達之非其見尤真桓伊善吹笛固矣而

著撫綏之效其功尤大平張樊二賊者桓宣也作莊周
六首者戴顓也至於三子皆國士而兩世皆相臣則又
若武周焉南北朝之時宋則夏侯詳王彭皆篤於父母
之恩而雀之來集天之湧泉有所感也劉瓛劉璡皆深
於兄弟之義而蓬室之共束帶之立尤為卓也鄭黑為
刺史有淮上之勲劉顯為參軍有十事之荅仕于梁者
裴邃督軍北入所過響應仕于隋者劉臻耽悅聖經稱
為漢聖以唐言之張路期令宣城才能可取龐嚴尹京
兆強幹不阿王世充之亂夏侯端焚其書徐敬業之亂
劉行舉拒其和董召南以孝聞而韓愈為之作董生行
李璵以孝著而柳宗元為之作孝門銘李敬玄該博群
籍而馬周有崇賢館之薦裴懷古平反訟獄而韓琬有

國名將之褒何武雖有投石之陋然盜起樅陽盡一死
之節剛可知矣李紳雖有短李之醜然官至翰林與三
俊之列才可稱矣五代之時招討使楊師厚護國軍張
存敬一節勇一膽略節度使徐懷玉宣武軍馬嗣勳一
勇敢一才武至於朱漢賓為人有膽力為政能守法贈
少傅謚貞惠宜矣以宋之時言之尹拙舉三史有純謹
之風李谷知二州有剛毅之操丁罕築河隄利歸於國
張綸復逋戶澤及於民召置帳下曉達軍政高瓊也其
子繼勳在蜀有威名其孫女為后有賢德至於孫遵甫
以經學中選以法度檢族豈以椒房之貴而招物議乎
官居使相疏陳八事呂夷簡也其子公綽有光於前公
獨有名於時至於子公著革新法之弊稱正獻之謚豈

以貴戚之家而來群謗乎閭日新爲供奉官多所建白
張傳爲監司官多所考覈始有忠實之名終有魚頭之
號魯宗道也始有循良之政終有孝義之行朱壽昌也
著易說者李捷著醫書者楊介高覲定茶法也曹穎叔
罷鑄錢也苗時中爲法以足糧食張整爲法以御軍旅
委於鬼公豈非偶然魏瓘築城之兆也得土如璧豈特
軍餉李植督師之譽也魏杞使金克尊國體王希呂作
相專尚廉潔常秩辭祿位志何清也魯有開通春秋學
何深也孫暉劉位姜才有死戰陣之勇牛富鞏信有赴
水火之忠凡此皆爲國事死者也董槐講易卦雷電不
迷王惟忠據韭山大羊知畏凡此皆居官守職者也逮
至于元孟祺杜昌皆從征伐者也至於殺我無殺百姓
李徽之死於泰定也儒者知有君父曹彥可之死於至
正也一謚忠文一謚節愍何愧乎馬希先張紹祖皆能
盡孝行也自歌舞以悅母心劉通之事小母也痛哭以
愈母疾張旺舅之事陳母也一詔褒美一詔旌表何忝
乎逮至我

朝人物之生甲於天下中山王徐達仗策來歸累破巨
敵而一人不妄殺卒有武寧之謚鄧禹之匹也開平王
常遇春率衆來歸累敗劇賊而一戰不少挫卒有忠武
之謚韓信之流也黔寧王沐英沉毅有智量而封雲南
之功何懋也謚昭靖宜矣東甌王湯和剛毅有智略而
安海上之功何大也謚襄武宜矣衛國公鄧愈陝國公
郭子興皆從定金陵者也一謚武順一謚宣武營國公

郭英梁國公趙德勝皆從征陳友諒者也一謚威襄一謚武桓姻聯帝室遇變有爲李貞之智也有子文忠身先士卒南征有功封岐陽王謚武靖豈偶然乎每戰必勝爵封靖海吳禎之能也其兄良號令嚴明盡平蠻夷封江國公謚襄烈豈倖致乎越國公胡大海攻拔諸州屢著奇功苗軍之亂以身死之名節塞乎天地矣高陽公耿再成從征渡江多著勞績苗軍之叛以義死之氣節重於山岳矣總制江淮者繆大亨端直無過從征倭寇者張赫勇略有爲曹良臣擊阿魯朶成戰蘇州花雲守太平軍功雖弗濟然一死之義足以植綱常也潘毅破荆楚張銓下濟南王真鎮廣西文事雖弗兼然百戰之勲足以掃蓬宇也陳德謚定襄王簡謚忠毅名當其實者也陳亨封涇國袁容封沂國位稱其德者也崇山侯李新有內附之誠東川侯胡海有外征之績胡斌征雲南有聲矣而弟尚公主山本官太常有聲矣而女爲皇妃從征內難屢建勲勞則有若東平王朱能也宜謚爲武烈矣至於廣恩伯劉才萊陽伯周長安鄉伯張勇忻城伯趙精何莫非效勞於永樂之初者乎智勇出衆能效忠勤則有若鄖國公張信也宜謚爲襄僖矣至於西寧侯宋琥崇信伯費瓖成國公朱勇鄖國公宋瑛何莫非竭忠於宣德之間者乎李遠封安平侯死北虜而不懾孫巖封應城伯守孤城以無虞郁新任戶部苗衷任兵部李敏任工部金純任禮部百足爲輔國之棟梁也李恪督後軍甯正督右軍高銘督中軍崔聚督左軍

皆足爲當道之熊羆也安然沈仕温皆典大藩而有勤慎之譽景福陳春皆僉督府而有勤勞之勲大理丞鄒魯執法不撓光祿卿張沁謹厚無二張耀皇甫斌皆殺一身以成仁楊冀安陳居敬皆佐六曹爲有力刑部尚書唐鐸兵部尚書單安仁刑部尚書朱濬皆有聲於朝廷立都御史吳斌僉都御史桂滿監察御史王質皆有聲於憲臺章順以隱士而官河南以謹慎重於銓曹張貫以太學生而尹北平以勤能推於公論至於郝致才一醫術耳而深於藥石之驗卒以官其子王綱一匹夫耳而篤於孝義之行至於旌其門天順以後濟濟多士生此王國吾未暇枚舉之也

蘇州府人物

山川表明麗湖海吞大荒韋應物之咏形勝也山澤多藏育風土清且嘉陸機之贊風物也蓋蘇州之地仲雍於此受封闔閭於此建國初爲越繼爲荆會稽郡設於秦而漢初因之江都郡隸於漢而順帝分之三國以下皆屬吳郡至隋之興始置蘇州此其沿革之大略也人生其間雖淫祠多奢好劍圖利然泰伯導其源仲雍揚其波故風俗清美人才輩出前後輝映固其所哉請其陳之周之時若季札願附子臧而有諸樊之讓可與言禮樂者也言偃比學中國習絃歌之治可以居文學者也若夫在于漢者曰臯伯通禮待梁鴻有尊賢之明仕于吳者曰朱桓善事孫權有保境之勲自吳及晉以及於唐爲陸爲張人物何彬彬耶是故吳

相者顧雍也厥後徽之才辨邵之諒譚之心計承之令聞皆雍之子弟也至於曰榮曰衆曰和以明亮稱曰琛曰覲之以雅素著曰憲之曰協以文學傳顧氏可謂極盛矣節操克脩而爲太傅者張溫也厥後儼之博聞翰之知幾馮之文敏邵之剛正皆溫之族系也至於曰永曰暢曰瓌曰裕以才幹稱曰岱曰融曰昭曰種以孝友著曰緒曰允曰率以文學顯張氏可謂有人矣全景文破東賊有漢水之封陸慧曉守東海有清介之譽感慟其父而至於殞身陸厥之孝也博學自勵而稱爲書厨陸澄之能也以文學親侍者陸倕而仕于南齊焉以蔬食終身者陸襄而仕于梁焉質問十事對無所失陸雲公也少明三禮講無所遺皇侃也工書畫者陸杲

號神童者陸瓊孫瑒倜儻好譁而侯景之亂能效其力陸子隆大破賊徒而武州之鎮能撫以和幼有大志者陸繕幼有志節者陸琰而琰之製刁銘接筆立成二應之比非過情矣少有志節者陸通少能屬文者潘徽而徽之撰集禮纂集群儒江摠之敬非偶得矣逮至於唐陸德明封吳縣男而有布帛之賜以其明於經張嗣宗爲太子師而有祭酒之授以其善於教朱子奢持節能平新羅之亂朱佐日咏詩最善層樓之句仕不赫赫訖無悔尤陸餘慶之危行言遜也初中八科自焚奏稿陸元方之積善餘慶也毋未葬妹未歸兄能辨之我當就死此陸趙曄之言何孝友也天下無事庸人自擾苟清其源何憂不聞此陸象先之言何明也陸景倩爲扶

漢承有真清之考陸長源爲宣武刺史有送車之愧通
春秋者陸希聲也工筆札者陸景融也凡此皆陸餘慶之
子孫也若夫張旭以頭濡墨雖失於狂而草書乃爲古
今之絕冠陸龜蒙以茶著經雖失於放而高尚足爲風
節之維持歸崇敬請代宗宗儉約歸登請憲宗納諫諍
皆明於治體者也沈既濟論科舉之法于公異作露布
之詞皆工於文才者也歸融劾盧周仁風采之峻厲
邪人爲之落膽矣顧少連擊裴延齡氣節之剛方小人
爲之股慄矣至於負土成塚有事親之孝賜米賑飢有
愛民之仁此又非丁公著乎逮至于宋范仲淹懷先憂
後樂之志出鎮關陝而有心喪膽落之謠謚爲文正萬
世仰之矣范純仁從胡瑗孫復之學劾論文石而有知

河中府之黜謚爲忠宣一時榮之矣范純佑事父不違
深適隱可謂孝矣而其弟范純禮范純粹皆爲名臣希
文可謂裕後矣范師道夙厲風操有聞則言可謂忠矣
而其子世京世亮皆舉進士忠宣可謂昌後矣幼習弓
矢及長勵學許洞也多識前言極論時事葉夢得也酒
酣落筆煙景萬狀李成也而妙於翰墨自名一家非米
芾乎料敵制勝出人意表鄭戩也而侍講邇英長於經
術非錢象先乎葉清臣疏太湖善治水也程師子無愆豪
惡善治獄也朱長文著書閱古而著六經辨說俞琰講
道淑徒而著周易會要李彌遜爲起居郎而阻和議李
彌大爲校書郎而奏邊防難兄難弟也其孫李韶爲學
士忠厚簡澹門無雜賓家教之相傳如此也黃由爲狀

元而贈少師衛涇爲狀元而贈太師有學有守也于時
鄭起潛爲學士篤志力學貶知潁州英賢之不幸如此
也朱良奮擊金兵衆爲披靡雖死何尤也王介會天不
雨乞免奸臣雖貶何傷也王桢爲尚書奏對剴切范成
大使金國忠節殫揚以元言之廉平有聲者于文傳之
爲知州也行輩加重者錢良佑之爲詩文也至於文曰
貞白英華詩曰水雲清嘯此又非王原傑乎逮至我
朝高啓爲文雅淡爲詩雄健而缶鳴等集至今人膾炙
之盧熊爲人質直爲治平和而清溪等集至今人寶藏
之楊基爲詩穠麗纖蔚稱爲高楊而眉菴集乃其所作
也韓奕爲文冲澹幽婉廁於晉宋而韓山人集乃其所
編也申屠衡明春秋而自號樹屋傭其文見於論蜀之
書鄭宏明周易而兩典文衡其學形於餘吟之集宋克
秦約梁時皆工於詩而有真草之作三事之陳噫餘之
集焉陳繼張洪劉鉉皆工於史而有怡菴之集歸田之
藁假菴之文焉以靖難之功授太子少師則有如姚廣
孝以穎悟之資舉進士第一則有如施槃張適時稱奇
童與十才子之列沈德選文華有東礪集之編曾曰彰
奉使交趾雖沒於軍中而正氣堂堂矣張益詩文有法
雖沒於王事而學大巍巍矣戶部尚書滕思勉有豁達
之節工部尚書王永和有忠義之節禮部尚書楊者翊則
有平實之節者也工部侍郎李蕢有精勤之才兵部侍
郎虞祥有敷奏之才禮部侍郎金問則有詩學之才者
也王汝玉贊東宮不愧文靖之謚陳鎰鎮陝西多有寬

惠之政監察御史陳祚有小學辨惑等書且彈劾不避
其心貶斥副都御史吳訥有小學集解等書且劄介有
為振舉憲度天順以後英才碩彥濟濟登庸吾未暇悉
舉之也

松江府人物

觀趙驥書院之議曰江流之清海涵之大九峯三泖旣
英且粹吾是以知是郡形勝之奇也觀魏了翁儒學之
記曰負海枕江平時疇沃野士奮於學民興於仁吾是以
知是郡人才之盛也蓋松江之地周為吳而入於越併
於楚婁縣置於呂秦吳郡設於東漢貞觀為崑山之名
天寶為華亭之地唐末屬之蘇郡石晉屬之秀州而松
江之名創于元也其曰華亭者由陸遜之封華亭侯其

曰上海者由商賈之聚上海市此其沿革之異也人生
其間素誘魚鹽之利習尚奢靡然府稱澤國風俗淳秀
而人才之出有可言者矣請具陳之三代人物不可考
矣自漢至晉松江人物莫盛於陸氏若陸康之舉茂才
而守武陵以恩信為治若陸績之舉曹掾而守鬱林以
著述為事康之從孫曰遜意思深長才堪負重而成抗
魏之功焉遜之弟曰陸瑁好學篤義諫伐公孫而著言
道之書焉曰陸凱者為建武都尉雖統軍衆手不釋卷
祭遵之儔也曰陸抗者拜奮武將軍輕兵躡晉畧無矜色馬異之匹
也以晉言之陸禕為鎮西大將軍華覈薦之曰體質方
剛器幹彊固非譽也陸雲為大將軍司馬閔鴻奇之曰
若非龍駒當是鳳雛非過也陸機少有異才文章冠世

而終遇孟玖之戮其死可哀也陸曄少有雅望以清直
著而終擢光祿之階其生何榮也愚故謂松江人物莫
盛於陸氏者如此裔是而後顧野王仕于陳精記博識
而輿地志玉篇國史記文集等書卓卓大筆也朱諤仕
于趙宋進士第二而疏奏開內閣延群臣分使者舉諸
道屹屹確論也唐之人才不可考而宋之人有足徵柳
約爲大觀間進士知嚴州之曰金兵入郡屹保孤城其
才略不世出也衛膚敏爲宣和間進士使金人之時論
難往復殊不爲屈其氣節不常有也恬於進取而註柳
文則有如潘緯工於文藝而註杜詩則有如高子鳳胡
林卿不登史彌遠之門何持身之嚴整也林至嘗侍朱
晦翁之席何學識之光明也衛謙著易管見建義塾以
訓一方田疇著四書說約設講席以訓六館一新郡學
而得祠於西廡非錢良臣爲叅知政事之日乎移堰入
港以避潮勢非許克昌爲右正言之時乎至於寶祐之
出剛介不阿元主之召銀辭不仕王泰來也以元言之
雪都郊王之被誣而有勇退之節夏侯尚玄也濟貧民
之飢而有旌表之榮夏椿也周之翰通象數之學觀四
圖贊曲盡其蘊任仁發窮都水之情觀水利書深造其
妙至於有漕運之功有榮敏之謚費察也至於我
朝陳文東以秀才而任解州判官其篆隸之體爲人所
準繩金思誠以老儒而爲左春坊中允其該博之學爲
世所楷範王公亮布政於兩廣能聲播騰任勉參政於
八閩吏民畏服錢全袞不肯仕張士誠浩然之氣籠襲人

襟裾且所著有群玉掇遺而學之高可見矣何庸爲江
西僉事激揚之名動於山岳且所著有律解辯疑而才
之偉可想矣王鍾爲司徒端厚之量足以師部屬陳詢
爲太司成剛正之操足以表風化以草書授廣平主簿
者夏宗文也以能書授順天府丞者朱孔易也沈度爲
學士而二品袍笏之賜足以榮華衮矣衛青爲指揮而
蒲臺城下之功足以勒鼎彝矣天順以後人才相繼鳴
玉濟濟五不遑悉舉之也

常州府人物

三記之於潤五湖之腴表此見於周處之記高節之所
興立俗此見於左思之賦蓋常州之地北抵江
淮東連海道其山之秀有秦望金鵝其嶺之峻有會仙
偃月其注有閭江太湖之險其井有聖水陸子之嘉考
其沿革自秦至東都皆屬會稽郡毗陵置於太康晉陵
改於東晉而常州之名創于隋也人生其間秀而多文
愿而循理然則人才之出豈不彬彬然有足慕者乎請
具陳之三代人物不可考矣漢之時虞後不事王莽以潔其身司
徒之召其言曰願爲漢鬼弗能事兩姓此其忠義可貫
日月彭脩不畏盜賊以救其父而矢之中其人曰自爲
彭君不爲太守其因信可感豚魚許武分財取譏以成
二弟之名此觀過可知仁也許荆引咎甘戮以救一弟之
生欲殺身以成仁也高彪舉孝廉之首而校書東觀數
奏賦頌畫彪像之詔受知於上矣王閔通天文之學而
爲陳留太守不交豪強王獨坐之號見推於時矣具有

周鮪設竒以成破魏之功晉有錢廣倡義以平陳敏之
亂至於周處力學好義而三害之名倏然願除顧愷之
博學善書而三絕之譽燁然傳播至於討張昌之妖其
才足有爲置義興之郡其名垂不朽此周處之子玘也
此皆晉之人也南北朝之時乞代弟命率獲見原吳欣
之其人也而齊表其閭貨田贖弟遂與同處吳達之其
人也而齊表其門蕭立策甲科以文學魁臺閣而有賈
馬之比周文育學騎射以大槩取富貴而有忠愍之謚
折節讀書遂有令譽非蕭思話乎父子拒敵大敗魏軍
非周盤龍乎事梁而與魏百戰鼓譟攻城陳慶之也仕
齊而伐魏深入從橫奮擊蕭摩訶也周寶安率兵南伐
而有衛尉卿之遷擢此又陳之人也劉子翼終養江南
而有孝慈里之表章此則隋之人也以唐言之衛湫從
擒建德錢九隴從平世充蔣儼從伐高麗皆唐太宗時
瓜牙也薛登以事奏中官劉禕之以言忤武后許景先
以法按強貴皆唐中宗時鷹鷂也秦景通精漢書而與
弟有二秦之名咸居館閣蔣又疏延齡而厥子有五芳
之譽皆躋顯要高智周爲刺史先見諸生蔣子慎令建
安克昌厥後王遇爲賊所得兄弟爭死孝友之行出於
真性蔣防作秋河賦援筆立成明敏之才聲於幼年以
宋言之張觀杜鎬俱仕南唐而輸忠於宋室余中邵材
俱魁南宮而有光於宜興錢公輔張巨皆從胡瑗而奏
議易解一根於理周孚先唐杖皆從程頤而纂次語錄
能自得師葛宮之屬文葛密之致仕葛書思之歸養清

節高義先後相映胡宿之救唐介胡宗愈之進六事胡
交脩之論大勢政事文學父子一轍張鑄之漕憲有聲
而其姪鼎之爲蔡齊所薦不愧進士及第也丁寶臣之
詩賦有聲而其兄宗臣爲歐陽脩所善不愧進士出身
也錢顛奏王安石鄒浩論章惇李端行霍端友皆忤乎
蔡京至於吳師古錢胡銓之疏而至於貶斥李祥伸汝
愚之寃而至於編管皆可謂不畏強禦矣胡唐老死於
鎮江蔣興祖死於陽武胡應炎陳炤死於元兵至於徐
道明一道士也而死於天慶觀莫謙之僧也而死於德
祐初皆可謂不屈威武矣斥張邦昌者李熙靖吳懋也
奏童貫者錢卽沈積中也尤袤著遂初小藁而其孫尤
情以儒者守邊可謂父作而子述也蔣之奇著文集百
卷而其孫蔣芾以恢復決奏可謂光前裕後也錢之望
以策干虞允文果有符離之捷向士璧以功妬於賈似
道及致言官之劾丘密以允文之舉而將畧震於邊錢
相以真德秀之薦而直聲著於廷以元言之梁燾著詩
傳旁通惠希孟之著易象鈎玄陸以術之著宋鑑提綱
皆於學有可稱也至於徐憲倪瓚陸垕皆非常人者焉
以我

朝言之謝應芳之著辨惑編王達之著天游藁陳濟之
著綱目正誤段民之脩經書皆於學有可用也至於孫
英吳雲王紱皆爲名士者焉若夫陳洽佐英國平交阯
功固偉矣鎮安南之日與賊遇而被害遺孀忠義不有
以激頑懦者乎王忠之乞以身代父死孝固切矣任兵

部之日以母老致仕卓卓清高不足以戒貪墨者乎錢
本中知吉水以恩信示賊徐晞在戶曹以明敏平亂司
業趙琬寺卿蔣守約皆有端謹之度僉都楊得安知州
蔣賢皆有清慎之操天順以後人才濟濟不乏吾未暇
枚舉之也

鎮江府人物

吳曰京口宋曰南徐唐曰丹陽此是郡沿革之異也絕
高爲京因山爲壘緣江爲境此是郡形勝之傑也蓋鎮
江之地東通吳會南接江湖西臨漢沔北拒淮泗乃三
吳襟帶之邦百越舟車之會用武之地西浙之門也人
生其間承泰伯之高蹤以禮遜相持者接踵也謂非英
質之舊壤矣乎請具陳之三代人物不俟言者矣姑以

丹陽人物言之若包咸見執於赤眉而誦經自若何膽
畧之雄韋昭見封於孫權而撰史可觀何學力之富儲
光羲丁仙芝皇甫冉許渾皆長於詩而施敬本之教國
子學桓彥範之復中宗位尤不愧乎官守也蔡肇翟汝
文葛勝仲皆工於文而洪興祖之悟中庸竇從周之從
晦翁尤精於理學也吳淑辨唐樂異同矣至於秘書校
理不阿權貴則有吳遵路焉邵必使契丹不屈矣至於
爲穎王翊善乃真國器則有子邵亢焉邵餗精篆書而
范仲淹竒之王存論朋黨而司馬光器之陳東論汪黃
之罪而剴切奏疏卒有秘閣之贈湯東野處苗劉之變
而調護聖躬卒有司空之拜我
朝則徐銘在道而有諤諤正直之風儲懋在科而有侃

很剛方之行凡此皆丹陽人物之表表者也以丹徒人物言之馬懷素之按魏元忠抗直不撓焦千之教呂希哲端方可法遊藏春而棄官不仕刁約之清高也惡和議而棄官不赴湯喬年之孤介也章瑤爲人子枯竹復生可以驗其孝之篤茅相爲人臣同帝赴海可以知其忠之大叱母癰而母免於失明則有如孫瑾救父之弱而父免於失水則有如徐鈺至於我

朝有王豫者爲御史而彈劾不避爲副憲而激揚有聲焉以金壇人物言之周積拒盜賊而磊落乎顛沛之秋戴叔倫能詩賦而馳聘乎文藝之圃蔣猷論士風深切時弊王遂論邪正最關國體張縝守揚州而死於金兵可謂卓然有守堵簡爲江浙行省而死於賊兵可謂超

然有見著華陽居士集者譚知柔而劉宰隱處三十年卒謚文清儒者之高蹈乎著諸史通考者丁明而張格居母喪逾年不御酒肉孝子之懿行乎至於我

朝有虞謙者辨天津之獄明而仁著玉雪之文博而約馬天順以後人才愈益精采有光前休吾未暇悉舉之也

揚州府人物

皇甫湜公是篇曰向江負山王觀揚州賦曰枕江臂淮蓋地控三齊重江復關之隩長淮千里四會五達之莊蔣之竒以爲淮海重地司馬光以爲江淮都會人生其間雖曰土俗輕揚見於孔氏帖之語然俗務儒雅見於吳陵志之贊故民從約而易化士循理而有文雖茅茨

之下徃徃聞絃誦之聲然則人才不有言者乎請具
陳之三代人物不可考矣姑以漢及宋者而雜論焉昔
邵平種瓜自給而足以忘已之憂必有以見其大也陳
琳作檄而足以愈人之疾必有以得其情也劉瑜則善
於天文不可以星官小之也李彥博則精於地理不可
以方術例之也呂岱年九十六而躬親王事何愛國之
誠也曹憲年百餘歲而留心字義何好學之篤也張紘
輔孫策范慎輔孫皓皆盡忠於吳主劉頌事晉武華譚
事晉惠皆盡瘁於晉室戴淵舉孝廉矣而死於王敦之
難匪躬之故也來護兒立高節矣而死於宇文化及之
害求全之毀也石藏用精曆數而依李瀉之家可謂擇
所主矣王紹宗工草隸而卻徐敬業之幣可謂堅所志
矣來濟處承乾之議曲盡事情可與王魏齊聲也潘倓
受南唐之戮懇切忠義可與逢干同遊也逮至于宋閉
門著書而以舉進士爲耻王伯起也蓋務內不務外首
選辟雍而以婿奸人爲愧吳敏也蓋邇正不邇邪胡瑗
教太學而有錢藻爲之徒藻淵篤人也足以衍其師之
訓喬竦教鄉里而有孫覺爲之徒覺端明人也足以廣
其學之傳張日用知人之哲所以妻鄭獬孫繫律身之
介所以拒蔡京包拯薦諸朝者張次山也必其行有類
於拯者趙鼎薦諸朝者劉太中也必其行有符於鼎者
孫升王覲皆有言責而吐補過之忠牛大年周麟之皆
爲官守而盡脩業之事崔公度作一法百利論所以規
英宗使入於正也沈銖講南山有臺詩以引哲宗使

當於道也高郵有三賢喬執中秦觀也此其鳴名
馳於海內揚州有三魁呂溱王昂李易也此其碩望播
於人間沈錫則辨元符之罪王惟熙則辨群飲之囚呂
溱爲狀元而仁宗見之曰此當作狀元也必德學有冠
世者矣王俊儀居第一而徽宗見之曰真所謂俊儀也
必其儀容有絕人者矣王居正之學根據六經而楊時
器之孫洙之學通達國體而韓琦稱之至於祈天以明
毋目者顧忻也刲股以療母疾者吳志興也逮至我
朝王鼎朱顯忠皆守死於開運之初陳珪顧成皆竭力
於靖難之日李民瞻本元舉人也而爲我朝尚書則盡
蹇蹇之瘁潘原明本元諛徒也而爲我
朝布政則馳赫赫之聲陸闔使朝鮮足以任皇華而不
辱曹義守遼東足以當干城而有餘著野堂之文者賀
庸而受經於余闕傳授何淵源也典貢士之衡者高穀
而見薦於楊士奇造詣何宏奧也天順以後人才絡繹
不絕吾未暇悉舉之也

新編博物策會卷之四

南直隸

屏石戴璟著

淮安府人物

南北襟喉江淮要衝董搏霄淮安之議也書軌新邦英雄舊里蘇子瞻淮陰之銘也蓋其地在江前流長淮却阻北控齊魯南蔽江淮古曰淮陰晉曰山陽是也說者謂是邦風俗人多勇悍習戰爭士多輕剽任氣節然漸漬聖化綽有儒風則夫政事文行卓然有名於世者豈不各垂芳於後哉請具陳之三代人物不可考矣漢之時韓信初事項羽不用而之漢有大功於社稷枚乘初事吳王濞不用而之梁畫忠款於國家孟卿於禮翼奉長

於詩嚴彭祖工於春秋得公羊之旨陳_士工於書檄愈
曹操之疾嚴延年治涿郡摧折強豪周紆令洛陽先問
貴戚陳球為零陵太守而盜賊自散糜竺為安漢將軍
而軍資自給臧洪陳容皆死於袁紹之難而步騭之避
難江東多所匡益則仕于吳者也王謏鮑泉有聲於宋
梁之時而包愷之精究漢書多所教授則仕于隋者也
以唐言之李義甫柔險如猫而王義方為侍御獨敢彈
劾甘竄其身於權勢灼灼之秋武則天兇暴如狼而徐
有功為大理獨尚仁恕獲全其身於憂禍岌岌之日至
於吳通玄之善文辭徐温之善書畫孫魴之善詩章皆
卓然有可紀者矣以五代言之沈斌仕晉為刺史契
丹犯祁以身死之而不卹魚崇諒仕晉為學士書詔繁

委以身嬰之而有餘至於劉全之能濟 幹劉仁規之
能治理劉崇俊之能仁愛皆整然有可法者矣逮至于
宋王資深峭厲自持而元發廷臣之奸何骨鯁也胡松
年銓選惟允而深得用人之體何冰清也張耒筆力雄
健以理為主而坐黨籍不幸也王洋累官三郡皆有異
政而東年集可考也劉福為雄州防禦雖不學而為政
簡易天資之暗合矣趙師旦知康州雖不克而以身殺
戮氣節之剛大矣事母至孝而謚為節孝者則有如徐
積伐金有功而稱為名將者則有如扈再興孫傳魏勝
憤車駕蒙塵而以忠勇自激昂陸秀夫張孝忠恨宗社
丘墟而以名節自砥礪元則杜佑嘗蠶以驗父疾果來
馴兔之祥史彥斌縛草以尋母棺卒免漂水之患逮至

我朝收集民兵者倪寬也屢戰屢勝軒豁蓬亭從事征伐者陳政也嘉謨嘉猷折衝樽俎劉江爲都督而建文之變靖難之功良多錢貴爲揮使而軍法之整操練之術克盡成均沈翼撻諸道之財而蒞政勤慎張士彬羅銓掌一方之憲而風紀振揚任大司寇者楊靖智識如神有片言折獄之才爲大司馬者李澂幹濟如流有千里決勝之策金濂以文臣封沐陽伯謚恭襄非以其平閩之功可將可相者乎劉榮以武臣封廣寧伯謚忠武非以其靖難之勲有馮有翼者乎天順以後人才不絕吾未暇悉舉也

廬州府人物

鄭集論廬州曰淮西重鎮葉祖洽論廬州曰一道都會蓋其地淮右爲襟喉江北爲唇齒紫荊跨其北龍眠蟠其前腹巢湖而控渦潁膺濡須而枕潛皖要之即周之廬子漢之金斗也人生其間氣果決性躁勁然尚淳質好儉約人物語音風土茂明皆勝淮左諸邦矣然則是郡之多才豈不爲是郡之增重哉請具陳之三代人物不可考矣秦有范增以衰老之年而每進機密之策惜重瞳之弗用耳漢有英布以虜之餘而數立異常之勲惜烏喙之無情耳周榮入袁客之幕瀝腹心之誠毛義捧安陽之檄著祿仕之孝此又東漢人物也三國之時赤壁之戰以寡勝衆此周瑜足以定鼎足合肥之戰以身赴敵此陳武可以當盤根丁奉爲冠軍而斬將搴旗

何勇如之王蕃爲常侍而博覽多記何文如之逮至於
唐任瓌謁高祖而畧地攻城亦布其勞可以居學士十
八人之間羅珣爲刺史而濟貧給藥甚著厥聲可以入
循吏四十人之列萬敬儒有廬墓之誠朱延壽有帥兵
之畧持身節儉安撫淮南則有楊行密也挺身決戰死
尸僵立則有袁人傑也墓濛善戰畧而表薦大保田頰
有大志而官至平章以五代言之王景仁以身先士卒
李章以法戢左右王安殺執槩之夫歷典數郡陶雅定
本州之盜歷知四州伍喬舉進士第一苦節自勵而程
文勒於岷石郭師從爲馬步虞候從征有功而壯節堅
於桑榆逮至于宋徐行周數世同居義氣藹於一門楊
眞進士第一文聲昭於一榜楊察爲制誥雅緻有體王
光濟刻母像奉事如生馬亮兩典鄉郡人以爲榮哉然
吾所取者以伸理挈之獄焦蹈四首鄉薦人以爲幸哉
然吾所喜者以鋪叙直言之對危言鯁論卓爾不群此
包拯之守鄉郡而有閻羅包老之號興利除害綽然可
紀此馬仲甫之知五州而有天章待制之擢號無爲子
而著樂記五卷非楊傑乎歷右司諫而著文粹百卷非
姚鉉乎賈易論天下大勢而王藺條列八事皆盡言無
隱者也東元嘉毀通城淫祠而汪立信條陳三策皆幹
濟有方者也鍾離瑾歷十郡太守蓋由嫁綠衣之女而
夢不虛矣王之道致九子登科蓋嘗著桐山之文而夢
不偶矣茹孝標雙漸胥致堯人不同而力學同也張肅
阮美成王綰官不一而循吏一也以元言之羊仁之孝

友葛聞孫之文雅朱可與教授諸生而文行兼備此窮而教人者也况遠延見諸生而講貫不輟此達而淑人者也至於余闕之爲人尤有可欽者分守安慶屹然砥柱之尊死戰孤城凜然泰山之重青陽之集流傳於古今忠宣之謚輝煌於宇宙以我

朝言之攻城畧地之功莫大於虢國公俞通海開漕通運之績莫懋於平江伯陳瑄領兵平楚則有如蔡國公張德勝逮其攻陳友諒於采石而沒於陣謚之忠毅何愧焉率兵渡江則有如楚國公廖永安逮其攻張士誠於太湖而陷於軍謚之武敏何忝焉永嘉侯朱亮祖汝陰侯高顯合浦侯陳清宣德侯金朝興皆布勲業於狼豕縱突之初周顯死渾河徐明死洪都陳懷死沙漠蔡世傑死石牌皆守名節於干戈歿敗之日楊璟陳文以軍功而一侯榮陽一侯東海吳復孫世以軍功而一侯安陸一侯雷春肅權從克太平而爲都督僉事稱其才矣張禮從平內難而爲中都留守揚其威矣郭奎學余闕而有望雲之藁李讓尚公主而有恭順之謚宋康侯徐忠少精武藝從征有功而郭亮王英亦善武畧者也然亮有成安侯之封必其功尤大也前將軍巫凱鎮守遼東邊方安靖而寧仲英寧福亦著才能者也然福有建平伯之封必其功尤顯也守太倉者朱文而號長鎗者瞿通也復太平者王珪而鎮山西者鄭亨也孫鎮知衛輝府先處良知平陽府各以才幹自奮蔚綬掌禮部事薛祥掌工部事皆以恭勤自勵刑寬爲狀元而居翰

林侍講之官必其文學足以經世者矣錢敏爲進士而上侍母還鄉之疏必其孝行足以範俗者矣天順以後人才益以烜赫有光先烈吾未暇悉舉也

安慶府人物

余闕之詩曰我我石窓直龔窟窟巖岫真此是邦形勝之奇也李白之詩曰奇峯出奇雲秀水含秀氣此是郡人物之盛也蓋其地北界清淮南濱皖水卽春秋皖國及舒桐之地也以其沿革攷之晉爲晉熙隋爲同安而安慶之名創于宋也人生其間培之以深秀穎厚澆之以蕩滌逸邈故淳質以爲性儉約以爲俗而人物有可言者矣請具陳之三代人物不可考矣若文翁守蜀郡而興教化文風與齊魯相比朱邑守桐鄉而尚廉平治行爲天下第一此漢時之出色者也何充風韻淹雅而萬夫之望見稱於時何準高尚寡欲而第五之名自任於已此晉時之白眉者也以南北朝言之立身簡約愛尚文義則有如何尚之也獨立不群歷郡清白則有如何昌寓也何敬容爲尚書銓序明審而有天下第一之稱何點通群書屢徵不就而有何氏三高之號至於仕南齊爲參軍定吉凶之禮非何佟之乎以唐言之召集親戚酣宴泣別張鎮周之盡私恩也舒州治下境內肅然張鎮周之盡公義也徐仲源事母至孝割股爲糜而名爲孝感鄉曹松光化登第年七十餘而號爲五老榜至於仕後唐爲太尉盡賢之禮非周本乎宋之時王琪王珪同祖兄弟也而比自自成一家之文然琪之陳數事植

孤介之性臨數州尚簡靜之政尤爲難也李公麟李亮
工李元中本同時登第也而有龍眠三李之號然公麟
考鍾鼎而長於詩善丹青而妙於書尤爲難也語忤太
守歸隱終身張漢卿也誨誘後學尤爲諄切王日休也
元之時馮三奇脩遼金宋三史善於鋪叙王幼學著綱
目集覽詳於考訂至於有夔桎強敵之才有城陷守死
之節又陳道夫然也逮至我

朝有柳昇者累立汗馬之功追封融國之爵汪善在大
理而有才辨之應酬吳昇在工科而有鯁介之砥礪天
順以後人才舒長愈益浩繁矣未暇論也

太平府人物

江山之勝天下之奇曾鞏之論姑孰也土質而靜民儉
而淳牟子才之狀風俗也蓋嘗觀七賢堂之記十詠
之詩則知左天門右牛渚鐵甕直其東石頭枕其北楊
顥所謂風煙樂國歌吹春臺而姑孰志所謂采石之險
甲於東南此其地亦傑矣人生其間民尚敦龐士知勤
學豈無卓異之才脩之於家而光之於國者哉請具陳
之三代人物不可考矣以漢言之破黃巾賊奉天子貢
陶謙之刺徐州也威恩遠著舉州感悅陶基之刺交州
也若夫晉之人物又有可言者與陶侃并力攻蘇峻者
陶回也與王導入宮侍衛者張闓也薛兼之器宇廓然
清素自執而張華奇之曰皆南金也宜矣何琦事母至
孝累召不起而桓溫過之曰此山有人也宜矣王敦謀
逆而樂道融謀誅之天討有辭矣然而憂憤瀕死不將

瞑目歸九泉乎梁碩專威而王諒謀討之出師有名矣
然而斷臂不畏不將含笑入地下乎凡此皆晉之人也
若夫梁之時撰千字文而梁主寵之為擢給事中周興
嗣也唐之時敗徐敬業而使民思之為立德政碑陶大
舉也若夫陳商隱仁山而江表從之甚衆唐人之樂何
如王居巖隱青山而行密求之甚切唐人之清何如張
惟儉為唐刺史與柳鎮友柳宗元嘆曰道博而無雜郭
祥正為宋中丞與蘇軾善梅堯臣嘆曰真太白後身然
宋之人物尤多焉王逢撰乾德指說而卻駙馬之請可
謂剛而不撓羅彥輔以荒政課最而來姑溪之思可謂
清而不濁芾許之款接黨人篤交朋之義其為朱子所
稱夫何愧呂武之往汀梅篤勤王之義其為文天祥所
用夫何忝盜兵攻德化縣而唐敏求死之朝廷為之錫
後忠義之慶也元兵攻鎮江府而陶居仁死之鄉人為
之立祠正直之報也元之時有胡光遠焉盡廬墓之仁
致祭魚之瑞我

朝潘廷堅於洪武初而有迎車駕之功吳庸於永樂初
而有靖內難之績條陳二十事而有謀畧無雙之對非
陶安之為參政乎與胡大海俱死而有當塗縣男之封
非王愷之制衢州乎至於杜智為知府而為治有聲後
敏為行人而出使不辱天順以後人才迭出不絕吾未
暇枚舉也

寧國府人物

士控吳蕪越州連歎與池白居易之詩也舟車繁會之

鄉風俗和柔之境尉遲樞之記也嘗以疆域考之作藩
南夏據吳上游有大江爲之襟有重山爲之阻其沿革
則漢曰丹陽晉曰宣城而寧國之名創于唐末也人生
其間民安物阜見於盧肇之言剛果詭浮形於常璩之
記以今考之信有足徵者矣請具陳之三代人物不可
考矣吳有紀亮有雲母隔坐之榮意必教子之有道也
晉有瞿硎先生有桓温造拜之敬意必持身之以正
也甘卓刺梁州善於撫綏俞縱死宣城甘於死節至於
何琦撫棺號慟有息火之祥三國評論有斷案之實以
唐言之左難當率衆保鄉而封國公石仲覽踈財結客
而官御史從宴曲江者劉太真詩爲群臣之首從征吳
元濟者方元蕩功爲諸將之先王炎嘗遊蜀李太白挽
之曰王公希世寶其亦善名言矣汪遵善絕句許棠朝
之曰小吏無禮其亦不知量矣築城以遏富人之橫絕
流以備姦盜之衝則有若羅立言焉飲酒常一百盃集
文至三百卷則有如邵拙焉逮至于宋舒雅丘旭皆舉
南唐進士第一也歸宋之後咸有文章可傳蒯鼈李含
章皆在太宗時進士第者也居官之日咸有德行可紀
梅詢在集賢殿屢言邊事於朝有功矣其子堯臣廣交
賢士與物無忤而有宛陵集焉吳柔勝在太學講明理
學於世有功矣其子淵苦志力學累官端明而有退菴
集焉許元爲轉運使楊佐爲都水監皆爲國任事者也
徐勣爲學士章夏爲中丞皆爲國效勞者也汪文諒以
里物獻京師喻於義也劉琦以奏疏劾安石竭其忠也

汪解為儒官三十年不愧胡瑗之弟子吳潛舉進士第
一人益振柔勝之箕裘許遂事親至孝軀獨慚許伯通
之謠王相如事君以忠而有不為盜作笈之郤編左氏
綴節者陳天麟也編太倉稊米集者周紫芝也魏良臣
堅築城壘虜寇之曰城民得以全生李兼自號雪巖卒
官之曰吏民為之罷市饒虎臣器宇魁然魏了翁竒之
萬文勝個儻有志而理宗竒之官至樞密使者趙禎也
寬厚可掬官至光祿卿者楊璉也篤學無比元之時貢
奎以文學名家而識度不凡時人莫窺其涯矣梅寔以
春秋名家而城陷不屈家人皆死於節義以我
朝言之何應龍從征中原固有開創之功矣而子執中
聚族同居不謂之象賢乎丁恕仗義輕財是固布衣之

賢矣其十鎡居官廉能不謂之克肖乎吳原頤明經善
詩學足以範儒林矣而為冬官卿有聲於開運之初者
秦達也戚遜發廩賑飢才足以任方面矣而在經歷司
有聲於斃虎之績者王著也王仕謙為儒學訓導而士
經其門者多所造就程富為提學御史而士服其教者
翕然作興天順以後人才代不乏人吾未暇悉舉之也

池州府人物

裴度之言曰依貴池之美據石城之固徐鉉之言曰浸
以秋浦鎮以齊山九峯競秀神采竒異劉禹錫言之江
山千里襟帶六朝曾會言之此池州之形勝如此也若
以言其沿革之異則古曰池陽隋曰秋浦而池州之名
始於唐也雖其祀社踏歌以獵漁為業然民淳氣和而

人物有名於世矣請具陳之漢晉人物不可考矣唐之時胡楚賓時爲右史而撰臣軌等書凡千餘篇顧雲肄業九華山而編昭亭雜筆共五十卷盧嗣立之登第也高元裕稱之曰中丞爲國拔賢才寒畯欣逢藻鑑開費冠卿之廬墓也杜荀鶴吊之曰不知三尺墓高却九華山帝豢能賦而吳融竒其文康駢善論而田頴聘於幕杜荀鶴不屑耕夫而詩律成一家有晚唐格之號周繇不肯終仕而與弟隱九華有建德二周之號然事母至孝哀毀滅性何澄粹也五代之時伍喬長於作詩賦舉進士第一不偶矣湯悅工於制誥吞墜水飛星有驗矣宋之時若湯允恭之寬厚有聲於理獄矣其姪巖起小圃爲樂棄官奉祠其不以富貴爲念也夏鴻之著述有功於史學矣其弟鵬蔬食爲業閉門授徒其不以道學自吝也拜命不出號清溪布衣非夏乾錫乎杜門不起號閉門先生非陳翥乎夏中正知本縣面訓鄉人而孫噩中才識兼茂科其有以教之也許規寓宣州棺斂病人而孫元官至天章待制其有以致之也胡舜元劾王安石檀固劾章惇高允文忤蔡京皆以正直值其性也方綱七百日同爨余起千言口同聚阮鍾鏜阮鍾儁十

一世同居皆以和氣藹其門也著春秋門例戚里元龜者王鉉也著六經辨證諸史稽考者丁黼也葉楠蠲租救荒邑人歌之曰前有蘇黃門後有葉令君汪與成刻像事親林楠美之曰事死如生有至難古來不獨數丁

蘭張璉治劇有聲足以顯陰德之報羅復遭敵不懾卒

致忠義之褒至於坐元祐黨擯不盡用者李植也元之時陳清隱著鳳髓集九峯詩楊少愚著衍孝編秋浦集克世其家累代同居方時發也募集義兵扶植良善陶起祖也至於我朝則潘伯庸有可取者初巡按兩浙有聲後按察河南有績天順以後人才累累不絕吾未暇枚舉之也

徽州府人物

權德輿序歙州曰有佳山水以資勝饒朱晦翁記新安曰其山峭厲而水清激再以其言考之峯峦掩映狀若雲屏晏殊之見於類要也州在万山中與天目齊程文臨之記於石橋也其名吳曰新都晉曰新安而徽州之名始于宋也人生其間性剛喜鬪然務高行奇節而以

文章學問取重當世然則登儒林光史籍者豈不多其人哉請具陳之漢晉人物不可考矣南北朝之時程靈洗斬華皎之使謚之忠壯宜矣程文季擅先鋒之能目之程虎宜矣唐之時吳少微本經學變文體徐庾之氣調一革矣至於汪華以上兵納款而有越國之封黃芮以割服事母而有產芝之異此皆唐之人也五代之時汪台符能文章通古今宋齊丘之猜忌有自矣至於查文徽著平閩之功而遷節度查元斬傳檄之使而拜侍御此皆五代之人也逮至于宋魏羽張諤初仕南唐今則皆有吏材馮抗馮儀馮价並第進士今則皆有治迹姦臣之亂人畏懼不敢言也然劾蔡京者黃葆光疏秦檜者金安節忤賈似道者呂沆此有三軍難奪之志矣

凶荒之年人委靡不能濟也然行荒政者王汝舟求其
兩者凌唐佐釋逋監者汪文振此有八荒爲闡之心矣
聶冠卿羅汝楫皆善談春秋者也一論尊王之義一論
法天之義可謂明而當程大昌王炎皆善解周易者也
一作易原之書一作易解之書可謂詳而盡呂文仲使
高麗而一毫不取有文集十卷焉朱并使粘罕而九死
不移有書解數卷焉書愚庸先生朱松用力格致子熹繼
之集諸儒之大成孔子孟後一人也龍圖待制俞獻可善
理刑賦弟獻卿繼之論時政之大端真宗時良佐也查
道奎陶兄弟爲治有聲而道之有犯不校尤可嘉也胡
一桂父子於易有聲而二子之著書甚富充足
多也謝泌望闕再拜薦賢以報國也而汪若海之上書

曹輔請立康王其忠俱可想矣胡舜陟守備淮西去盜
以安民也而朱安國之經畧廣東能捕劇盜其功皆不
細矣詹惠明代父之刑祝確寢弟之柩其篤天倫如此
也曹矩蒙忠孝之詔盧臣中受諫議之贈其敦人道如
此也鄉民訟田程邁決之父子訟庭汪必達化之然決
之不若化之之深也奸相用事程元岳彈之權豪得志
程崇抑之然抑之不若彈之之勁也估價平糶以濟人
急者程琰損價出谷以濟人急者汪勃其宅心何慈良
乎紹定中禮部第一者程元鳳淳熙中禮部第一者程
卓其積學何高儲乎汪叔詹善理財魏瓘善疏江皆有
一長可用也程惟象號三靈丘濬悟二卦皆有一藝可
驗也著龍溪集者汪藻著自警言編者趙善璫而汪綱之

律曆諸書靡不研究其學尤有本原也著王堂集者程叔達著爾雅羽翼者羅願而呂午之論諫切直靡有顧忌其人亦爲端方也元之時胡炳文之篤志朱子之學而五經會義等書發先人所未發之緒程復心會折黃氏之說而四書總要等書闡前賢所未闡之蘊定宇先生曰陳櫟所著有四書發明禮記集義環谷先生曰汪克寬所著有春秋纂疏綱目考異程文之學見於遺藁倪士毅之學形於輯釋當長槍軍之來寇汪澤民則曰我受國厚恩臨危受死非臣子之節也城陷被害精神磊砢雖死之日猶生之年也當我

朝兵之至鄭玉則曰吾旣不能慷慨殺身尤當從容以就死也衣冠自縊氣節豪邁雖身之殺實仁之成也至於吳訥者方五溪蠻之亂引兵自刎其詩曰怪石有痕龍已去落花無主鳥空啼其剛大之氣慘怛之狀豈不至今猶有生氣也哉逮至我

朝朱升隱石門而博洽群書然爲翰林學士有論思之益矣詹同舉茂才而穎悟好學然爲吏部尚書有衡鑑之公矣著述不輟莫過於趙汭英邁有爲莫過於汪景明至於胡永成之才氣揚寧之明決王俊得之剛正又何莫非金玉之器砥柱之才乎天順以後人才絡繹如麻吾未得悉數之也

滁洲人物

讀歐陽脩醉翁亭記則知滁地有清高之勝讀詔中紫微泉記則知滁人有淳厚之風蓋是邦乃楊州之域吳

楚之交烏江蕩其南清淮灌其北形勝深秀實甲淮海
載以其沿革考之或曰滁陽或曰南譙或曰永陽此其
名之異也人之居於此者易以德化難以力服豈無人
才有益於家國者乎請具陳之漢晉人物不可考矣唐
之時吾得一邢文偉焉居典膳之職謹守禮經諫太子
之非累遷鳳閣逮至于宋張洎在翰林博通墳典其兩
子皆貴顯此人之樂賢父也茅革令貴也善理財訟其
五子皆貴顯此天之福善人也雍存號南郭先生而曾
肇與之遊則其造行可知矣徐徽號獨山居士而錢公
輔與之交則其爲人可想矣徐象賢之清潔有一介不
取之風張鼎之廉直有四知皆畏之志吳蔚一臨淮簿
耳然青苗之行區畫得宜上不損官下不損民趙察一
永福丞耳然事親之義周悉殆盡臣可謂忠子可謂孝
張環卻羨餘之貢雖忤勢要而不悔苟與齡盡廬墓之
孝至產芝莖而足徵元之時范思敬獻治平之策而傾
乎葵誠巽之紛若也隱梁庄之間而其於蠖屈坤之括
囊也逮至我

朝副都元帥何世隆糾兵守城有功於群雄沸起之秋
都督僉事李茂之從征渡江有功於諸將爭奮之日黃
立棊以文藝之巧居工部有聲矣范常以文學之高典
兵牘不忝矣楊元果爲府尹以志行見尊於僚案魏忠
今洛陽以廉介見許於銓曹譚淵有戰真定之功不幸
死於兵追封崇安侯謚壯節時論躋之方政有征麓川
之功不幸沒於陣追封威遠伯謚忠毅仕途仰之從征

有勳而爲大司馬樂詔鳳也英毅有智而封雲陽伯陳
旭也南和侯方瑛提兵破賊鎮守雲南武平伯陳友屢
使沙漠能平苗寇天順以後人才間見不絕吾未暇枚
舉之也

廣德州人物

論廣德之地本桐汭之故疆論廣德之名出鴻嘉之改
建蓋其地本揚州斗星之域吳之西疆秦之鄣郡爲冊
陽郡者漢也爲陳留郡者梁也考其三峯拱前溪流枕
後靈山泉石甲於一郡人生其間雖喜事鬼神然性淳
事簡號江東道院則其風之良可知矣然則人才豈無
可言者乎請具陳之漢晉人物不可考矣以唐言之潘
晃以父疾而感夢有奔走之誠以父沒而廬墓有芝生

之瑞可謂之孝矣宋之時查深隱居力學而錢公輔薦
之以官馬查揆俊敏能文而陳紆悼之以詩馬倪濤年
十五將太學試第一以諫議貶官亦無尤矣何大奎年
十八於禮部試第一以文章著名亦足奇矣有桐州集
者沈虛中也爲冢宰能稱其職焉有清閔集者周承勛
也爲縣令能盡其才焉召試館職以厚人倫扶國綱爲
對者章汝鈞也秉筆都曹以勵忠貞務廉退爲尚者梅
應發也李嘉言知二州而皆有去思之號吳應龍陳八
事而皆有嘉納之實名其村曰湯清者湯景仁非以其
爲寧國令有廉介之操乎號其里曰旌孝者李彭年非以
其親沒於兵有感慕之誠乎至於我
朝爲御史而按諸道有肅僚之貞遷長史而事藩王有

繩愆之直此又非孫昇乎天順以後人才間見不絕吾未暇悉舉之也

和州人物

晉曰歷陽宋曰南豫此和州之名號異也鎮曰梁山浸曰歷湖此和州之形勝奇也蓋其地當江淮水陸之衝爲姑孰金陵之蔽劉禹錫所謂瀕江畫中流爲水疆者卽此地也人生其間躁勁而果決淳質而儉約然則人才之出建業於生前垂芳於死後者不亦多乎請具陳之漢晉人物不可考矣南北朝之時事毋至孝有如劉瑜焉每戰必捷有如昌義之馬唐之時勒思齊爲游擊而神力百倍李太白爲之詩者是也張籍爲文章而體態一新韓昌黎與之游者是也何蕃一太學生耳朱泚

之亂唱六館之士凜凜乎冰霜之操也非唐德宗時之英賢乎何宗英一布衣耳南渡之變淮萬言之書蛇蛇乎藥石之語也非宋紹興之豪傑乎然宋之人物豈止於此魏征忤秦檜而有親征之奏愛國之心誠也張孝伯勸韓侂胄而有僞學之弛諷諫之功偉也蔣子春卻金虜之官肉視虎狼矣正氣何堂堂耶龍六楫值金虜之兵水視鼎鑊矣剛心何侃侃耶登上舍第使金不屈張邵也浩然之氣足以寒氈裘焉歷事三朝白首不渝沈立也屹然之操足以激頑懦焉錢藻之辭學重於時豈徒口耳之末而已耶徐兢以書翰追於古豈徒筆札之工而已耶張孝祥文章俊逸而舉紹興狀元天沒之日孝宗之所甚嘆也趙時賞議論慷慨而往南劔勤王敗

劬之日文天祥之所深悼也以元言之累轉運之官存寬厚之量張茂之也逮至我

朝陳亨軍令嚴明出鎮大寧而北方爲之按謚矣李彬勇畧蓋世出鎮交趾而南方爲之安靖矣華高爲平章雖絕於宗嗣矣然武莊之謚不足以光百世之史乎耿定爲參議雖濱於戰死矣然按察之贈不足以慰九泉之鬼乎勇敢自奮者李濬也揮一衛之軍政而爲之下者容敢怯耶勤勞克効者紀清也督一府之軍政而爲之屬者容敢懈耶天順以後人才相繼不絕吾未暇悉舉之也

徐州人物

徐州之封疆房心之分野蘇軾記則曰岡嶺四合韓愈

詩則曰汴泗交流蓋此乃項羽建都之地東齊魯北趙魏南江淮西梁楚昔人謂要害之地霸者之餘是也人生其間雖語多楚音好尚賓將然挾任氣節以自淬礪而赫然丕烈照耀宇宙者自古已蓋簪矣奚俟今日而始盛耶請具陳之三代人物不可考矣漢之時蕭何先收圖籍功固大矣而餉饋之給關中之鎮尤足以爲元勲之首焉曹參問關百戰功固偉矣而清淨之治約束之遵尤足以當畫一之歌焉白馬之盟一申野雞之計以杜王陵之直而不釐也擁劍於鴻門之會排闥於枕窟之時樊噲之勇而不亂也與漢高同起沛而有乘參戰之功非周繆乎與漢高同生日而有破滅荼之功非盧縮乎申屠嘉本材官蹶張也然而鄧通之辱深得大

臣之體矣夏侯嬰本沛廐司御也然而平城之殿切存
報國之忠矣周昌有從破項羽之功而易儲之爭如批
逆鱗非有致身之節而能然耶周勃有從定垓下之功
而左袒之議如探虎口非有應變之才而能然耶周亞
夫細柳之屯可謂真將軍董孟風詩之進可謂賢王傳
丁寬作易說三萬言而高相之易丁將軍傳之也施讎
與諸儒講五經而龔舍之詩王吉授之也龔勝至三舉
孝廉然王莽召而不赴忠義之節真金試百鍊矣其視
唐遵輩何啻天淵耶姜肱與二弟孝友然桓帝徵而不
起孤介之行鳳凰翔千仞矣其視曹節輩何啻天鼠耶
長菑丘者劉平也而政化大行可以並魯恭之駕矣令
雍丘者劉矩也而亮直不阿可以齊周紆之驅矣朱淨

為函牧而軍功著於一時劉馥刺揚州而恩化及於百
姓三國之時張昭相吳而容貌矜嚴嚴峻使蜀而才辨
清捷然峻之著孝經傳兼文學矣晉之時劉伶之隱逸
不妄交游劉訥之識鑿不妄品題然伶之著酒德頌太
放達矣劉弘有幹或稱之曰得劉公一紙書賢於十部
從事也其為人感悅如此劉疇有名節或稱之曰劉君
若過江我不獨拜公也其為人推服如此當晉之末有
劉牢之之沉毅而有子敬宣仕宋以身見殺忠義之激
也當宋之時有朱齡石之平易而有弟超石仝朝以功
封侯果銳之驗也劉粹鎮京口而進爵為男到彥之鎮
荆楚而進爵為侯劉芳作窮通論以自慰然撰述十有
六書則仕于魏者也劉璠作雪賦以自喻然著作梁典

三十餘卷則仕于梁者也劉伯龍爲鬼所笑然爲宋太
守十年而猶貧窶非清白之遺如是乎劉劬爲賊所害
然關門七十人而皆文章非陶鎔之勤如是乎隋之時
劉士雋孝母而墓前之虎爲之取食孝子之行其精感
乎劉行本直諫而殿前之笞爲之少止仁人之言其利
溥乎幸江都以切諫而貶職至臨川以拒賊而殺身此
又劉子翊也以唐言之劉延祐善吏治李勣戒之曰年
少有美名宜少自抑此其人之剛毅可知矣劉知幾著
國史徐堅稱之曰爲史氏者宜置之座右此其學之雄
贍可知矣劉德威爲大理卿能革禁網之密劉臧用爲
侍御史能劾權倖之非五代之時劉仁贍以監守清雅
甘心死節尤爲卓然可敬者矣逮至于宋劉壽有勇退

之節而四世並進士及第郭廷謂有恭謹之操而二世
並朝廷顯官鼂廻少有學行及在翰林楊億稱其得代
言之體劉顏少好古學及著樞言石介恨其非弟子之
列王漢忠有破契丹之功身雖尚武而名稱茂矣趙立
有破金人之功事雖不濟而心事白矣蔡齊妻以女王
安石薦以官則有若劉庠文學曾子固詩學黃庭堅則
有若陳師道鄭僅鄭望之父子並以文學名然僅之知
福昌盜賊不入境尤爲難也顏太初顏復父子並以學
行名然太初之作諷詩著述爲甚富尤可嘉也宋汝爲
使金卻劉豫之官且上恢復方畧而忠嘉集皆忠盡所
發也李若谷遊洛正緱氏之葬且子淑童子出身而孫
皆仕時乃家教所成也以金言之則有若曹珪之六義

滅親朱存器之拾金還主以元言之則有若曹南之博
學能文徹里之應對詳雅然元之人物又有可言者曹
伯啓以詩文自娛而六子與十孫皆顯豈倖然耶袁遵
道以子貴封公而年十六五經能誦豈易然耶敦朴務
實戎克敬之為典籍也勒兵血戰石晉之為樞密也許
義夫卑騎出郊以卻巨敵郭通伏柩息火以盡孝道逮
至我

朝朴實無華始終惟一尚書朱守仁也練達政務治績
書最參政孟驥也任肅為知府王弼為知縣皆不愧循
吏而張宏知荊州門絕私謁有閉門張之號焉巽志為
學士黃正為御史皆不愧清要而權謹拜文華有風勵
為子之詔焉督右軍者山青督中軍者陳敬皆有御軍
之畧者也封景城者馬榮判建寧者劉泰皆有靖難之
勲者也至於同知湖州以績最佐理太僕以勤能此非
甄實罕夫順以後人才接踵不絕吾未暇悉論也

徐州府志

十一

卷之十一

